

REGIONAL NEWS BULLETIN
Regional News Unit AIR Aizawl
Tuesday, October 10, 2023
Time - 7:30 -7:40Hrs

HEADLINES (MORNING)

- Mizoram State Assembly Inthlanpui chu November Ni 7 ah neih a ni dawn a, December Ni 3 ah Vote chhiar a ni ang.
- Mizoram inthlanpuia vote chhiar hun chu Pathianni-a a tlak avangin Mizoramah helh tu an tam hle.
- Sairang leh Vairengte inkar kawngpui thawm hna ngawrh taka thawh mek a ni.

<><><>

ELECTION STATE

Mizoram State Assembly Inthlanpui chu November Ni 7 ah neih a ni dawn a, December Ni 3 ah Vote chhiar a ni ang.

Inthlanpui vote thlak neih hun hi nimin khan Election Commission of India-a Chief Election Commissioner Rajiv Kumar chuan a puang a, Mizoram rualin Chhatisgarh, Madhya Pradesh, Rajasthan leh Telangana te Assembly inthlan hun puan a ni a.

Mizoram State bikah October Ni 13 hian inthlan hriattirna tihchhuah a ni anga, chuh tumte tan hming thehluh hun tawp ni chu October Ni 20-a ni anga, October Ni 21-ah hming endik a ni anga, inhnukdawk duh tan October Ni 23 thleng hun hawn a ni ang a, Inthlan Vote thlak Ni hi November Ni 7 ah neih a ni dawn a. December Ni 3 ah Vote chhiar a ni ang.

Mizoram-ah hian vote nei mi 8,51,895 an awm a, Inthlan hnuhnung ber aia vote thlak thei tam na hi vote 83,714 a ni a, kum 2018 khan zaa 81.61 in vote an thlak a ni.

Nimin vek khan Mizoram CEO Pu Madhup Vyas chuan Press Conference ko in Media-te chu inthlanna felfai leh dik neih a nih theih nana tih tur leh tih loh turte a tam thei ang ber puangzar turin a chah a. MPF leh NGO dangte'n election muanawm leh felfai tak neih kawnga theihtawp an chhuah thin chu fakawm a ti a. Mizo mipui vote nei tawh phawt chu vote thlak theuh tur leh vote thlak thatna ber ni tura thawhhopuia a sawm a ni.

Mizoram CEO chuan ECI-in Vote thlak hun a puan velah atangin Model Code of Conduct chu hman tan nghal anih thu a sawi a, Political Party zawng zawng te leh Sorkar Officer te pawh Model Code of Conduct hnuaiah hian khuahkhirh an ni a. Voter te duhthlanna ti buai thei zawnga chet lakna chi reng reng chu khap a nih thu a sawi baw.

Pu Madhup Vyas chuan sawi danin Addl. CEO kaihhruai State Level Media Cell din niin District tinahte kalpui a ni a, Election Official-te tan

training hrang hrang kalpui a ni a ti bawk a, Vote a tlak that theih nan SVEEP kaltlangin zirtirna kalpui mek niin EVM leh VVPAT First Level Checking zawhfel a ni a, Ballot Unit 2035, Control Unit 2018 leh Voter Verifiable Paper Audit Trail (VVPAT) 2021 te inthlanna atana hman turin venhimna khauh tak hnuaiah kaw l mek a ni bawk.

<><><>

COUNTING DAY REACTIONS

Election Commission of India in state 5-a vote chhiar hun a puan December ni 3 chu Pathianni anih vangin Mizoramah helh tu an tam hle a, sawn tir tura rawtna MNF leh Congress Party in ECI ah an thaw n nghal.

MNF Party thuchhuah tarlan danin Mizoram Legislative Assembly Election result chhiar hun atana Kristiante ni bik, Pathian biak inkhawm ni tak a ruat chu tha an ti lo hle a, Mizo kristiante palzutnaah an ngai tih sawiin Chief Minister Pu Zoramthanga rawtna angin nimin khan Chief Election Commissioner, Election Commission of India hnenah Pu TC.Kaphmingthanga General Secretary, MNF General Headquarters hmingin sawn dil turin an thehluh tih an sawi.

Mizoram Pradesh Youth Congress Committee (MPYCC) chuan, Election Commission of India in Pathianni-a MLA General Election vote chhiar tura a tih chu an duhlo takzet a, vote chhiar ni hi sawn leh ngei turin Election Commission of India an phut tih an sawi a, bawk.

Congress Party chuan thuchhuah siam nghalin Vote chhiar ni atana Kristiante ni pawimawh Pathianni a ruat chu an duhloh thu an sawi a, Election Commission hnenah an duhlohzia na takin an thlen tih an sawi bawk.

Mizoram Synod Moderator Rev Dr C. Chawngghmingliana chuan Mizoram inthlan result puan hun Pathiannia a ruat chu tha anti lo hle tih sawiin hemi chungchangah hian Mizoram Kohhran Hruaitute Committee thutkhawm chu zanin hian koh nghal a ni a ti.

He ni hi Kristian te tana ni pawimawh tak Bible sunday niin hmun tinah hun pawimawh tak a chang a, Kristian te tana ni pawimawh Pathianni ah inthlan result puan chuan a kaih hnawih zawng zawng inkhawm theilo tur leh hnathawk tura chhuak tur te tan a harsat a rin thu a sawi a, Election Commission hnenah an duhlohna thlen ngei an tum tih sawiin Mizoram mai ni lo state danga Kristian te pawhin harsatna an tawh phah a rin thu a sawi bawk.

<><><>

RTI WEEK

Right to Information (RTI) Week pualin nimin khan Champhai DC Conference Hall, Keifangtlang-ah hman a ni a. Champhai DC Pu James Lalrinchhanan a hmanpui.

He hunah hian Champhai District Head of office te, SPIO leh SAPIO, Champhai MJA hotute, Champhai Sub Hqrs MHIP, YMA leh MUP hruaitute an tel a ni.

Champhai DC & District Appellate Authority Pu James Lalrinchanna chuan mipuite rorelna sawrkar (Democracy) leh RTI chu thil kal kawp tlat a ni a ti a, Sawrkar hmalakna leh hnathawhte hriat chu khua leh tui te chanvo a ni, a ti a. He Dan hi anih tur anga hman tangkai anih theih nan RTI hnuaia mawhphurna fawng chelhtu SPIO leh SAPIO-te chu he Dan hi lo in zirchianga, a hun bituk chhung ngeia information pe chhuak thin turin a chah a.

RTI chu India khua leh tui zawng zawngte tana dikna chanvo pawimawh berte zing ami ani tih hre thar leh turin kalkhawmte chu chahin, mipui puih

duhna rilru pu tlat chung a RTI zawhna te uluk taka chhang thin turin a chah a. He Dan hnuai chetlak dan tur chungchanga hriattiam loh leh hriatchina duh an neihte chu District administration-ah emaw Mizoram Information Commission lamah inthlahrung lova zawtfiah thin turin a chah a. Mipuiten sawrkar atanga an hriat duh apiang an hriat theihna hmanrua RTI hi langtlang sawrkar siamna tura thil pawimawh, sawrkar khalh ngiltu leh sawrkar tha siamtu hmanraw tangkai tak a nih avangin Champhai District mipuite chu RTI hmang uar deuh deuh turin a chah a ni.

RTI Week hi October 5- October 12 chhungin ram pumah hman a ni a. A lawmna pui ber chu Aizawlah neih niin District Headquarters tinah he hapta chhung hian RTI Act pualin hun an hmang vek dawn a ni.

<><><>

SAIRANG-BAIRABI UPDATE

Chief Minister Pu Zoramthanga hova Mizoram PWD hotute, NHIDCL leh Joint Action Committee on Pliable Road te meeting thuchhuak bawhzuina kal zelah nimin khan kawngpui thawmthat hna thawh nghal a ni a,

Sorkar thuchhuah tarlan danin, kawngpui Meter 15 a thui a lehlam concrete a ni a, Sairang leh Kawnpui inkara kawng chhe lai metre 110 a thui chu lung phah zawh a ni a, Kawnpuiah kawng khuar hmun li, Kawnpui leh Buichali inkarah pathum, Bilkhawthlir khaw chhungah khuar tenau pathum leh Vairengte lamah khuar paruk hnawh khah an ni.

Hmun hrang hrangah Lung phurh thlen belh mek zel an ni a, khawl leh labour te pawh dah belh an ni bawk.

<><><>

MUSHROOM CULTIVATION

Mizo mipuite pâ khâwia hriatna zau zawk leh zirtirna tha an hmuh theih nan, kar khat awh Pa Khawi dan inzirtirna Mizoram Science Technology & Innovation Council (MISTIC) Mushroom Centre buatsaihin nimin khan neih tan a ni a,

Innovation Facility Centre (IFC), Auditorium-ah Pu Lalmalsawma Pachuau, Planning & Programme Implementation Department Secy chuan a hawng.

Hawwna programme-ah hian thusawiin Pu Lalmalsawma Pachuau chuan Pa khawia eizawng tur te tan Planning and Programme Implementation Department hnuaia Mizoram Start Up Mission pawhin sumdawnna an kalpui zel dan tura pui turin an inhuam thu a sawi.

Mushroom Centre, MISTIC hi sorkar laipui Department of Biotechnology project fund hmuh atanga din a ni a. He project-ah hian CSIR-Institute of Himalayan Bioresource Technology, IHBT, Palampur, Himachal Pradesh te nen an thawk dun a ni. CSIR-IHBT hian an mushroom technology chu MISTIC-ah pein, March thla khan an scientist te rawn zinin helaiah training an rawn pe a. Chu mai bakah chuan Mushroom Centre staff te pawh ni 10 chhung May thla khan training in IHBT-ah an kal tawh bawk a ni.

Training hi Mizo mipuite pâ khâwia kawng kawhmuhtu leh eizawnna bul tan tura inpuahchahna kawngah hmanraw pawimawh tak a nih ngei theih nana buatsaih a ni. Pâ chi siam atanga a thar chhuah thleng chipchiar taka

inzirtir tum a ni a. Training-ah hian Shiitake leh Oyster Mushroom, Vitamin D pai tam, chaw ṭha leh hrisel zawk thlurbing bik a ni ang.

Training atana inziak lut hi an ṭhaṭhnem avangin kar hnih awh turin chhawng hniha ruahman a ni a. A kar khatna hian Ni 9 aṭanga Ni 13 October leh kar hnihna hian Ni 16 - 19 October chhung a awh dawn a ni. Training chhuakte aṭang hian Beneficiary thlangin, Mushroom Centre, MISTIC-in enzuipui hna thawk tura ruahhman a ni.

<><><>

CYM

Manipura Zofa pawl hrang hrang khaikhawm tura din Zo United hruaitute chu nimin khan Central YMA Office ah lengin an hmalak dan te CYMA hruaitute an sawipui a, Central YMA chuan Manipur tualchhung buainaa Zo United hmalakna atan cheng nuai 20 an hlan.

Zo United hruaitute hian Manipur tualchhung buaina avanga Zofaten harsatna an tawh chungchangah Zo United in hma an lak chhoh mek dan te an tarlang a, Zofa pawl hrang hrang te lungrual taka an kal thu leh inpumkhat zelna tura theihtawp an chhuah thu an sawi.

Central YMA President Pu R. Lalngheta chuan Zo United hmalak chhoh dan leh Manipura Zofa unaute zingah inpumkhatna a awm zel avanga lawmawm a tih thu a sawi a. Central YMA chuan tanpui an ngaihna apiangah theihtawp an chhuah zel tur thu a sawi bawk.

<><><>